



**Rara anentsü akhangba ama
inyaktsü Ukraine renema lir: US**

**2025 IPL NUNG England
batter Brook masayatsü**

VOL. XXII ISSUE NO. 146 (ADOK 146) DIMAPUR SANGTENNÜ (TUESDAY) METSÜREMI (MARCH) 11, 2025 ₹ 5.00

AKM aser ANCSU-i KPA atema nenshir



Dimapur, March 10, 2025

(TYO): Ao Kaketshir Mungdang (AKM)-i Khelhoshe Polytechnic Atoizu (KPA) nungi engineering degree college ka akümtsü akhangba pusema nungitba metetdaksüogo.

Iba onük atema AKM-i All Sümi Students' Union (SKK) den külemi noktaker ta Tir Lanutoshi Aier aser Tongti Tezülur Satemmongba nati sangdong ka nung ashi.

KPA ya Nagaland nung polytechnic mezüngbuba aser tejentiba lir saka lapokli nungi temulung magütsüi dang arur. Nagaland Cabinet-i 2007 nung KPA upgradation asütsü mulunga agizük saka iba mapa meinyaki dang arur ta AKM-i ashi.

"Nagaland nung government engineering college ka maliba ajanga kaketshir aika state adena orr technical education azüngtsüsa akümer. Iba ajanga senotsü aika endokba den kibongtem nem khuret tulu bentsür arur. Sorkari KPA senzuka yutsüba ya magizüker aser parnoki lemtetba meinyakba atema tebilemtsü khuret abentsü" ta AKM-isa ashi.

SKK-i sorkar dang parnoki

nangzüka inyakang ta akhangba nung AKM-ia pusema nungiter. Nagaland nung lanurtem nem technical education temeten magütsüba ya kaketshirtemi odangbo meyütsütsü ta AKM-isa metetdaksüogo.

All Nagaland College Students' Union (ANCSU)-ia tanga sangdong ka nung Khelhoshe Polytechnic Atoizu ya full-fledged engineering college ka akümtsü sorkar dangi shidi züluba nenshia metetdaksüogo.

"December 17, 2007 nü Nagaland state cabinet senden nung Khelhoshe Polytechnic Atoizu nung civil engineering course ka tenzüksü aser degree engineering college ka ama upgradation asütsü lemteta aliba ama meinyakba ya süoki ia bilemtsüba onük ka lir" ta President Tenyesinlo Bukh aser Tongti Tezülur Kivinoka A Sema nati sangdong ka nung ashi.

All Sumi Students' Union (SKK)-i timi lungkak aitba aser ANCSU-i shidi zülüaka sorkari mapa kecha meinyakba ajanga sorkari state nung kaketshirtem asoshi aria mebilemtsüba sayur ta parnokisa ashi.

NSF-i Inner Line Regulation Commission (ILRC) tentetogo

Dimapur, March 10, 2025

(TYO): December 4, 2024 nü 4 buba NSF Federal Assembly nung Inner Line Regulation Commission (ILRC) tentettsü bangjemtepba ama tentetogo ta Naga Students' Federation (NSF)-i Hombarnü metetdaksüogo.

Asen limai ozüng alema nisungtem aruba noktangsü atema iba lemtet agi. Ozüng alema arurtem ajanga asen maitsü, sobaliba aser litsü temetentem nung lendong bentsür arutsü ta NSF-isa ashi.

ILRC-i tang lateta aliba temzüngtem meyipa reprangshitsü aser akangshitsü. Ozüng alema aruba noktangsü atema tebilembatem lemsateptsü aser sendaktepa alirtem den civil organizations den yaritepa iba khuret atema inyaktsü, ta NSF-isa ashi.

Inner Line Pass (ILP) ya

küm 150 tejakdang asen lima nung lisopurtem kümzüka ayutsü atema yanglu. Ajisüaka yimtenren tashimaitba den ketdangsübaren nung tamakok anguba ajanga ozüng alema arurtem asen lima nung arua liyonga arur. Iba ajanga Naga nunger parnok dang nungi nütüng yongsüjk tajemba akümtsüsa tensa ka ajuruogo ta parnokisa ashi.

Naga nunger ajaki iba rara nung yariteptsü ayongzüker aser asenok longiemer iba khuret agientsü merangdi, ta NSF-isa metetdaksü.

ILRC züngsemtem:

1. EnoSenchumo NSN Lotha - Chairman
2. EnoKelhouniezo Yhome - Member
3. Eno Hukavi Tokheho Yephthomi - Member
4. Eno Imtiakum - Member
5. Eno Seve R. Vadeo - Member

Nagaland nung SRF 5.0 Knowledge Exchange Workshop agir

Dimapur, March 10, 2025

(TYO): Kohima nung tanü nungi anogo ananü atema "SRF 5.0 Knowledge Exchange Workshop" (Nagaland Edition) tenzükogo.

Iba sentong ya Banquet Hall, Hotel Vivor, Kohima nung agir aser Department of Industry aser Commerce, Kohima in Collaboration with the Department for Promotion of Industry and Internal Trade (DPIIT) Ministries of Commerce and Industry, Government of India yaritepa ayongzüker.

"Startup India initiative ya January 16, 2016 nungi tenzüker aser state tem Startup Ranking ya knowledge-sharing workshop ka ama lir" ta DPIIT Director, Dr. Sumeet Jarangal, IAS-i ashi.

Dr. Sumeet-isa Fund of Funds, Credit Guarantee Fund, aser India Seed Fund Scheme tem indang osang metetdaksü.

"Ibala workshops ajanga startup support programs osang tali jangjadaktsür aser beneficiaries atongtsü atema ajaki yariteptsü nüngdaker. Iba sentong ya startups atema dang

masü saka tebilemba tasentem aser tangatetba melenshidaktsütsü atema lir" ta paisa ashi.

"Department for Promotion of Industry and Internal Trade (DPIIT)-i iba tongtipang workshop atema Nagaland shimtetba atema tenüngsang agütsür" ta Industries & Commerce, Advisor Hekani Jakhalu-i ashi.

"Secretary of DPIIT, Ministry of Commerce & Industry, Amardeep Singh Bhatia-i Nagaland nung iba sentong agitsü mulunga agizükba aser yariba atema kangasa pelar" ta Hekani-i ashi.

Alima nung startups rongnung India ya jenjang tasembuba nung lir. Iba ya state aser union territory tem nungi teshimtet nübotemi külemi yaritepba ajanga lir ta laisa ashi.

Nagaland nung entrepreneurship tangatetba ya tasen lir. 2013 nung Nagaland sorkari lanur tangatetba melenshidaktsütsü atema program ka tenzüker aser parnok nem entrepreneurship tangatetba

agütsü. Lanurtem ajungmesotsü atema sentong balala agia aruogo aser parnoki entrepreneurship ya tongtipang wadang ka akümtsü tangatetba agütsüogo, ta Hekani-isa metetdaksü.

DPIIT-i ayongzüka workshop ajanga sendaktepa alirtem ajungmesotsü aser jenjang tajungba akümtsü. Ibala sentong ajanga aika angazüker aser itemji taküm piyong atema senti lir ta laisa ashi.

Iba sentong ajanga North Eastern region ajunga ka külemi longjemtsü, kati ka dang nungi angazüktsü aser tashi aittsü maongka agütsür ta Advisor Hekani-isa ashi.

Iba sentong nung Department of Industry & Commerce Deputy Director Keneirienuo T. Zatsu-i "The Journey of Nagaland's Startup Ecosystem" indang presentation ka sayu.

Chief Executive Officer, Innovation Cell (TGIC), Telangana Meraj Faheem, aser Joint Secretary of MSME, Odisha Kamaljit Das nati entrepreneurship indang onük jembi.

ANCSU-i college 3 nung principal shimtsü akhanger

Dimapur, March 10, 2025

(TYO): All Nagaland College Students' Union (ANCSU)-i Dimapur Government College, Zunheboto Government College, aser Wangkhao Government College nung principal tem mapa lezmüksütsü mepishiogo.

ANCSU-i Commissioner & Secretary of Higher Education and Technical dangi shidi ka züluba nung department-i college

asem nung principal mapa tazüng aliba atema mepelaba shia lir.

"Aiben mepishiaka principal mapa tazüng lir aser iba ajanga ketdangsübaren nung timtem ajurur. Item rejutem nung principal maliba ajanga kaketshirtem, tesayurtem aser staff ratadaktsür. Talisa NAAC assessment and accreditation mapa aser New Education Policy (NEP) 2020 mapa tenzüksüba

maparen nung tetsükdaktsü ajurur" ta ANCSU-i ashi.

"Department-i college asem nung principal mapa shimtsü aser retired principal o professor tem agientsüla akhanger. Iba shidi züluba sülen anogo tenet tsüngda mapa mienyakra onoki kaketshirtem kümzüka ayutsü atema ozüngi melaba ama lungkak aittsü" ta parnokisa metetdaksüogo.

2029-30 tashi nung Nagaland rongsenketzüng \$10 billion atongtsü

Kohima, March 10, 2025

(TYO): Nagaland rongsenketzüng ya \$ 5.30 billion shi ta asadangteta lir aser compound annual growth rate (CAGR) 12.55% nung ainba ajanga 2029-30 nung \$ 10 billion atongtsü.

Iba osang ya Department of Economics & Statistics-i sayaba Nagaland Economy Survey 2024-25 nung shia lir.

Chief Minister Neiphiu Rio-i Budget 2025-26 session nung iba survey osang benoka liasü aser Nagaland rongsenketzüng kanga junga renloka aoba shia lir.

"Ali rongsen agiba den rongsenketzüng renloka aoba ajanga state renlokba nung shilem tulu agitsü. State sorkari Viksit Bharat nung state rongsen ajanga shilem agitetsü aser infrastructure jenjang ajungkettsü atema inyaker" ta Nagaland Economy Survey

2024-25 nung shia lir.

Financial year 2024-25 nung state rongsenketzüng 5.59% renloktsü imlar. Tesüiba küm ishika Nagaland rongsenketzüng jenjang kanga renloka arudar ta survey nungsa shia lir.

COVID-19 wara sülen state rongsenketzüng maparen tajungba kümdaktsütsü meranga arur. Tan financial year nung Gross State Domestic Products (GSDP) constant price 5.59% aser current price 9.64% renloktsü asadangteta lir.

February 17, 2025 tashi nung 2024-25 atema Advance Estimates of GSDP nung ajemdaker state rongsenketzüng \$ 5.30 billion lir aser compound annual growth rate (CAGR) 12.55% nung aintsü imlar. 2029-30 tashi nung 10 billion atongtsü, ta survey ajanga ashir.

2023-24 (Provisional) nung

Rs. 21561 crores nungi 2024-25 (Advance Estimates) nung Rs. 22766 crores renloktsü. Nominal terms nung 2023-24 (P) nung Rs. 412 crores nungi 2024-25 (AE) nung Rs. 45198 crores teimba kümogo.

2024-25 (AE) nung Nagaland indang Per Capita Income (PCI) 11% aintsü asadangteta lir. 2023-24 (P) nung Rs.159737 aliba nungi 2024-25 nung Rs. 178304 kümogo.

Nagaland indang total expenditure ji 23,727.87 crores (-0.07 percent decline) ta asadangteta lir aser capital expenditure 10.06 percent nungi 6,835 crores ajemtsü ta Nagaland Economy Survey 2024-25 ajanga ashir.

Revenue expenditure nung salaries (7,301.06 crores) aser pensions (3,557.05 crores) endoker ta survey nungsa shia lir.

Foundational Music Production Workshop tembangogo



Foundational Music Production Workshop tembanga sentong ka Kohima nung March 8, 2025 nü agidang tangokba noksa ka nung Project Director, Dr. Hovithal Sothu den ketdangsür aser training agirtem angur.

Dimapur, Metsüremi/March 10 (TYO): Task Force for Music & Arts (TaFMA) ajanga Skilling Nagaland sentong kübok Kohima nung March 8, 2025 nü Foundational Music Production Workshop takok ngua ayongzüka agiogo.

Iba workshop nung music producers akumtsü jangrar aser musicians ajak agi nisung 22 arua shilem agia tanü-asüng amshiba music technology sayua liasü.

Shisalen sayur Imcha Imchen-i parnok dang mera agitsü ayongzüker aser tarutsü nung nüngdakba mapang

yariteptsü mulunga lir ta ashi.

Iba workshop tembangba sentong nung shilem agirtemi ajangshiba aser talisa ken yangluba nung Artificial Intelligence amshiba angazükba indang lemsatepa liasü.

Ano music production software tasen amshia inyaksü maongka agütsüba atema pelaba lemsatep aser angati angazükdaktsüba asoshi TaFMA dang pelaba den tarutsü anogo nunga iba mesük sentong ayongzüksü ajungshia liasü.

Project Director, Dr.

Hovithal Sothu-i shilem agirtem dang pei jangraba mapa nung temulung agüja inyaksü ayongzüker aser Chariman, TaFMA, Theja Meru dang Nagaland nung kenten menü aintsü asoshi bendanga agütsür inyakba atema tenüngsang agüja liasü.

Paisa tarutsü anogotem nunga iba ama professional training sentongtem tali agitsü ta ashi.

Workshop tembanga Adu Keditsu, Manager (Electrical & Electronics), aser Aleno Sale, Media Officer nati kulizüng kaket agüja liasü.

Tuli nung Maruti Suzuki sales & services point semzükogo



Dimapur, Metsüremi/March 10 (TYO): Mokokchung district kübok Tuli jila nung March 10, 2025 nü Maruti Suzuki sales and service point of dealer principal, Seyie Auto semzükba ya Nagaland nung kanga kera ainba aser tesem

tajung nung amenoka aliba jila nung mezüng alitsü.

Iba franchise kibur Tiamong Yaden lia iba tesem meshiteta Rev. Nukshi Yaden, pastor, Merangkong Baptist Arogo ajanga sarasademtsü aser K Seyie ajanga ribbon mejepa

lapoktsü.

Company tenüng nung Seyie Auto indang CEO Ketho Seyie-i jembi aser civil ketdangsür tenüng nung SDO (Civil), Tuli, Nukshimatong ajanga jembia liasü.

Sentong nung Dr Lulen Jamir menden liasü aser sentong tembanga Rev. Tongpang, Pastor, Tuli Lenden Baptist Arogo ajanga sarasadem.

Tangbo Maruti Suzuki gari alirtem mesüra taliner temi Tuli jila nung sales aser services agitettsü.

NCC Cadets temi Dzukou Valley nung mürekmeju mapa inyak



Dimapur, Metsüremi/March 10 (TYO): Tetso College Dimapur nungi National Cadet Corps (NCC) indang cadets 45-i Dzukou Valley nung mürekmeju mapa inyaka liasü.

World wildlife Day nüngtem nung Group HQ Kohima kübok mürekmejuba sentong ayongzüker nung 1 Nagaland Battalion NCC aser 24

Nagaland (I) Company nungi cadets tem dena liasü.

Cadets temi ibai tayongzüker ka ama agizüka March 8 & 9, 2025 anogotem mürekmejuba mapa inyaka liasü.

NCC cadets temi March 9, 2025 nü World Wildlife Day nüngtem nung Wild Life Protection and Preservation

indang osang proker ama alitsü aser libajen wazüka ayutsü tenangzüktep agia liasü.

Iba sentong ya March 6, 2025 nü Tetso College nung Principal aser Director ajanga tenzüksü aser libajen wazüka aser müreka ayuba nung lanurtemi tongti shilem agitsü indang tayongzüker o jembia liasü.

Tuensang DC-i gari tulu senzüba nokdanger

Dimapur, Metsüremi/March 10 (TYO): Tuensang-Longleng lenmang tang teyangludak aliba mechi iba lenmang nung March 10-15, 2025 anogotem gari tulu senzüba nokdanger, ta Deputy Commissioner, Tuensang,

Lithrongla Tongpi Rutsa-i sangdong ka nung metetdaksü. Senzüsemponger lendong nungi jenbutsü aser iba lenmang yangluba mapa junga inyaktettsü mechi khen atema iba tenokdangba ya agütsür, ta sangdong ajanga ashi.

EastDimapur Town Council ajanga metetdaksür

Dimapur, Metsüremi/March 10 (TYO): East Dimapur Town Council office ajanga Purana Bazar, East Dimapur Daily Market Building nung rent (ki amshiba taa) magütsü alir ajunga dang anogo 30 tsüngta menoktsü metetdaksüogo.

Pei rent menoker aliba allottees temi jangjatsü aser approval atema original receipt

bener arutsüla. Atakzüker aliba mapang nung sen magütsür mesüra sen agütsüba receipt mesayuteter indang allotment agentsütsü, ta EDTC sangdong ajanga ashi.

Allottees temi pei indang shop/room number tejanga den allotment order benar arutsüla, ta sangdong ajangasa metetdaksü.

Takum Aser Tanela Asoshi Shisa Mozü kaket sayaogo

Dimapur, Metsüremi/March 10 (TYO): Ao oshi nung züluba "Takum Aser Tanela Asoshi Shisa Mozu" (Wisdom Medicine for Life and Spirit) kaket March 7, 2025 nü Hotel Japfu, Kohima nung Executive Secretary, Nagaland Police Baptist Churches Association ajanga sayatsüogo.

Kaket zülur ya arishi küm 86 tain Meyisongla lir, shiba Health & Family Welfare Department nung Deputy Director (Nursing) inyaka lia mapa nungi anisüngzüker ngua liasü. La ya social worker tejanga ka lir aser lai tang tashinung kaket ti zülur lir.

Meyisongla-i ashiba agi iba kaket ya lai tesüiba küm ishika tsüngta Tir Yimiyim olemsabang

nung züluba tem bendenba lir.

La takum nung temoatsü balala anguba atema lai Tsüngrem nem tenüngsang agütsü aser tang tashinung iba kaket ya copy 500 menünga lir aser angati lema agütsütsü, ta ashi. Iba kaket adoktsü atema shisatsü agütsüba atema lai Senior Accounts Officer, Kikalemba nem tenüngsang agüja liasü.

Sentong nung Rtd. Chief Information Commissioner, Meyionen Jamir-i jembidang, kaket zülur ya pa lanuwa mapang nungi kanga junga meteta liasü aser la dak tezü tanga yutsüba yimya meliasü ta ashi aser arishi küm 86 nunga kaket zülutetba asoshi tetushi agüja liasü.

2nd Yemhi Cultural & Literary Fest agiogo



Dimapur, Metsüremi/March 10 (TYO): Yemhi Memorial College pur 2 buba Yemhi Cultural and Literary Fest sentong March 7, 2025 nü college telung nung agia liasü, kong Kahuto Chishi Sumi Spokesperson, Nagaland GB Federation sentong akumdong ama aden.

Mezüng sentong nung Akali Sumi HOD History department menden liasü aser Loinoli Zhimomi, Finance Secretary, Evangelical Union, YMC ajanga sentong tenzüka sarasadem. Iba sülen Dr. Kaba Daniel, Principal, YMC ajanga pela agizüker o jembi aser BA 2nd Semester azünger temi 'We are the Nagas' ken aten.

Sentong nung BA 6th Semester ajanga 'The Yimkhiung Legend of the Giant Snake and the Girl' jilushi agi shilem agia liasü aser kaketshir temi Traditional Fusion dance den

Nagaland nung kin balala indang sübosolemsü sayua liasü.

Sentong akumdong Kahuto Chishi Sumi-i jembidang, sobaliba ya chiyongtsü mesüra sübosolemsü kisüng masü saka asen otsüla-oboula nungeri angazükdakja amshia aruba yimyakoya dena lir, ta ashi.

Ochimashi madak takok angutsü sempet tajungtibaji ochi ashiba aser meranga inyakba ya lir, anungji lanur temi asen otsüla-oboula nunger ama item yimya amshitsüla, ta pai ayongzüker.

Mapa tajung inyaka tetsü oshi wazüka ayutsü pai ayongzüka liasü.

Lowrance Marak, vice president, YMCSC ajanga tepela o jembiba sülen T Aienla HoD Education ajanga sarasadema mezüng noklem tembanga liasü.

Tanabuba sentong nung kaketshir kija aser telok balalai kenten-menü yimya ajanga shilem agia liasü.



Mumbai, March 10, 2025: Hombarnü Maharashtra Deputy Chief Minister Ajit Pawar aser Minister of State for Finance, Ashish Jaiswal nati state Budget 2025-26 benoktsü atema assembly-i arudang tangokba noksa nung angur.

NEP onük nung opposition-i Parliament senden nungi ayazüka ao

New Delhi, Metsüremi/ March 10 (Agencies): Hombarnü Parliament nung budget senden tanabuba shilem tenzükba sülen delimitation aser New Education Policy (NEP) onük nung opposition MP temi Rajya Sabha senden nungi ayazüka ao.

Tamil Nadu nung National Education Policy (NEP) benokba anema DMK-i sorkar aitsü.

Lok Sabha nung Union Education Minister, Dharmendra Pradhan-i, DMK-i Tamil Nadu nung kaketshirtem tarutsü tia raksaja politics asayar ta jembiba anema opposition MP tem sabangleni oa longkak aita liasü.

DMK MP, P Wilson-i, Tamil Nadu nung delimitation onük nung o lemteptsü atema Deputy Chairman-i memelungba sülen Rajya Sabha nung DMK MP temi longkak aita senden nungi ayazüka ao, ta metetdaksü.

Wilson-i X ajanga, "DMK floor leader Tiruchi Siva künati Rajya Sabha nung Business Rule kübok notice ka agüja

Tamil Nadu nung delimitation atema o lemteptsü mepishia liasü. Iba ya kanga tongtibang, kechiyong state nung family planning ajanga nütsüng kangabo marener. 2026 küm nungi delimitation exercise agitsü, aser iba atemaji onoki tebilemtsü akar," ta metetdaksü.

Rajya Sabha nung Union Health Minister, JP Nadda-i, "O lemteptsü atema notice magütsüdangyongi tamasa parnoki temzüngtem jungjunga azüngtsüla. Opposition lenir densema opposition züngsemtemi refresher course ka agitsüla aser temzüngtem tama angatetsüla," ta ashi.

Nadda-isa, "Iba ya Parliament tenüng menüksütsü atema lir. Temzüng kübok onük ajak nung o lemteptsü atema sorkari melunga lir," ta ashi.

DMK MP, Tiruchi Siva-i, "2026 küm agitsü aliba delimitation exercise atema onoki tebilemtsü akar. Tanur asoba azüokbaji (north aser south nung) kasa masü. Nütsüng sasep nung delimitation

exercise agira Tamil Nadu aser tanga state kar nungbo menden aika ajema kümtsütsü. Onok menden 39 aliba nungi 31 dang akümtsü, Kerala nung menden 20 aliba nungi 12 dang akümtsü, ano state karbo menden 30-40 tali angutsü, anungji Parliament nung menden liromemedemtsü," ta metetdaksü.

Osangbener den jembidang Rajya Sabha MP, Rekha Sharma-i, "Opposition-i teti senden nung timtem agütsür aser tongtibang onüktem sendoker. Tanüa parnoki yamaji inyaksü saka iba atemaji onok renema dang lir," ta metetdaksü.

Hombarnep Lok Sabha aser Rajya Sabha nung züngsemtemi Manipur aser Jammu & Kashmir nung security tensa, Tamil Nadu nung railway projects, stock market nung takoksa anguba aser south India nung delimitation exercise atema o lemteptsü takhangba agüja liasü.

Budget senden tanabuba shilem Hombar tenzükser aser April 4 nü tembangtsü.

Jharkhand kübok Bokaro nung anwara proker

Ranchi/New Delhi, March 10 (Agencies): Ita ka tejaklen Jharkhand yimtiba, Ranchi nung anwara prokba nokdangtsü atema an 5,500 tepseta indokba sülen tang Bokaro district nunga anwara prok tenzükogo, ta state ketdangser kati metetdaksü.

H5N1 ajanga anwara tenzükbaji March 7 nü official süa jangjaogo. Iba mapang nungji Centre-i shidi ka ajanga Jharkhand chief secretary nem osang metetdakja liasü.

Bokaro district kübok Sector 12 nung aliba sorkar farm ka nung anwara jangja. Iba farm nungji an 250 bo süadokogo.

Union Ministry of Fisheries, Animal Husbandry & Dairying-i Jharkhand state dang anwara nokdangtsü atema anwara aliba tesemtem sangdongtsü aser an tepseta indoktsü tuyuba sülen Honibarnü Bokaro district administration-i an 46 tepset aser antzü 506 raksaa indokogo, ta Bokaro Animal Husbandry Officer, Dr Manoj Mani-i metetdaksü.

Anwara aliba kilometer ana telongtetji 'affected zone' ta sangdongogo aser iba telongtet nung aliba an ajak tepseta indoktsü, ta paisa metetdaksü.

"Iba dak alia kilometer 20 telongtetji 'surveillance zone' ta sangdongogo aser iba telongtet nung an ayokba mesüra alizükba nokdangogo. Tanü nungi awareness campaign ka tenzüktsü," ta Mani-isa metetdaksü.

Sorkar an farm nungji ketdangser Dr Anil Kumar Sinha-i, February 20 nü mezüing an aika asü, ta metetdaksü.

"February 23 nü an 12 asü aser February 25 nü onoki Ranchi-i samples yok aser February 27 nü Kolkata-i samples yok. Kolkata nung aliba laboratory nungi osang aruba nung ajemdaker March 5 nü onoki Bhopal nung aliba laboratory-i samples yoka liasü," ta Sinha-isa metetdaksü.

Bhopal nung aliba ICAR-National Institute of High Security Animal Diseases (NIHSAD)-i March 7 nü samples nung H5N1 positive putetba osang metetdaksü.

Sorkar farm nungji anogo 15 tsüingda an 250 asü.

Taoba ita nunga Ranchi nung aliba Birsa Agriculture University (BAU) indang an farm ka nung anwara putetba sülen an 5,488 tepseta liasü.

Myanmar nung taila centers nungi India nunger 300 kümzük

New Delhi, Metsüremi/ March 10 (Agencies): Myanmar linük nung ochimashi taila centers balala nungi India nunger 300 jungnüa kümzükba sülen Hombarnü Thailand ajanga India-i anir aruogo, ta ketdangsertemi metetdaksü.

China nunger operators-i ozüing alema achayyangba online centres mita aoba sülen linük 20 dak tema nungi item taila centres nung inyaker 7,000 shi kümzükogo.

Item centers nungi kümzükertemji teimbaka China nungertem liasü. Parnok aika

Myanmar-Thailand arrtsülen liasü. India nunger ketdangsertemi bus tenet nung India nunger 266 den India tsür 17 Thailand nung aliba Mae Sot airport-i anir aoba sülen parnok ajak tayimtsü ka ajanga India-i anir aruogo.

India nungertemji anir arutsü atema India sorkari C-17 transport tayimtsü ka yoka liasü.

China-ia par senso 2,000 dak kümzükogo aser Myanmar nung aliba item centers ajak samatsütsü atema maneni inyakdar.

Goa assembly election nung AAP-i tangar den meloktepi tokteptsü

New Delhi, March 10 (Agencies): Hombarnü Aam Aadmi Party (AAP) lenir Atishi-i, taruba Goa assembly elections nung parnoki tangar den meloktepi tokteptsü, ta metetdaksü.

Goa nung taruba Zilla Parishad elections aser municipal elections nunga parnoki tanga party den meloktepi tokteptsü, ta laisa metetdaksü.

Yaküm June ita nung Goa nung Parliamentary constituency ana nung Bharatiya Janata Party (BJP) aser Indian National Congress (INC) nati menden kaka nung takok ngua liasü. Opposition INDIA teloktepi vote shilem 40.1 angu aser BJP-i aniba NDA teloktepi vote shilem 51.6

ngua liasü.

2022 küm Goa Legislative assembly elections nung largest party ji BJP liasü (menden 20), iba sülen Indian National Congress (11) liasü. Aam Aadmi Party (AAP) aser Maharashtra Gomantak Party (MAG) nati menden anana nung takok angu, Goa Forward Party (GFP)-i menden ka, Independent candidates 3-i takok angu aser Revolutionary Goans Party-ia menden ka nung takok ngua liasü.

Taoba Goa assembly election nung BJP-i vote shilem 33.31 angu, INC-i vote shilem 23.46, AAP-i shilem 6.77 aser MAG-i shilem 7.60 ngua liasü.

Tanüngba vote shilemji party tilatem aser independents-i angu.



March 10, 2025 nü New Delhi nung Congress lenir Rahul Gandhi aser Priyanka Gandhi Vadra nati Lok Sabha Speaker Om Birla ajurua senden amendang tangokba noksa nung angur.



TIR YIMYIM YIMOBILEM (EDITORIAL)

DIMAPUR TUESDAY, MARCH (METSÜREMI) 11, 2025

Rongsen mamshitetba timtem

Tsüngremibo Nagaland ya takar lima yanglutsü saka Nagaland nung alirtemi peisasa takar mekümtet sensaka alir. Aji oda, Nagaland tatar senden nung küm shia Nagaland asoshi senotsü sentong yanglubaji taaktsüka, aji center sorkari Assam nung tzümtsüng aruba mapang tesama aser takoksa ajurur nem teyari agütsütsü asoshi agütsüba sen dang nungi ishinba agi yanglutsüsa adoker aser ibajia tarutsü aliba dang nungibo teindoktsü teimba yanglutsüsa akümer, anungji küm matemdangyongi jelia Nagaland government-bo sentsü nung küm temadoker. Ibaji Nagaland nem Tsüngremi rongsen memoatsüba agi masü saka Tsüngremi moatsüba rongsentem tagitsü kuma mamshitetba agi rongsen madak alir ser nung takar chir tagitsü mait kuma ao ama timatemer. Aji oda, tangbo Nagaland nung ali tema nung tenük agi anguba long aser süng dang masü saka ali dena tua Assam nung mapa inyakterem dang ayoker. Ajisüaka, asen akaba rongsenji süng, long aser aliji dang masü saka shitakba asenok takar kuma alitsüba rongsenjibo ali telong nung akaba totsü, ali mijang aser shinülongtem lir. Ashiko, ano item dang nungi sentiba rongsentema ali telong nung Tsüngremi rezünga yuja alitsüa akok. Ajisüaka, asenoki item rongsentemji agiteta mamshidaktsüba agi takar agi kangshia sensaker kümer alir amai okrongseta alir. Talisa, tanga rongsentemji yutsür, Nagaland nung Wokha, Mokochung, Peren, Chümoukedima aser Kohima district-tem ali telong nung ya totzü tzüyim amai atsüngdaka lir aser asenoki totzüji atsüteta magiba agi Assam tsütsü nungi tiplen tua oagi atsüdar asütsü ta temulung melemi bilemer. Aji oda, totzü ya tzü dang asünungji ali telonglen Assam aser Nagaland na arrtsü len totzü atsünga alibaji totzü tzübo ka dang asütsüa akok aser iba amaji totzü tzü agi len tangjema lira tang atsüa agir atema tajangzük aser matsür takoksa ta asütsü. Atangji, Nagaland nung totzü atsütsü nokdangbaji tapi agi nokdangba masü saka Naga nunger yimten nüchiso ngur külenang Naga nunger ali telong nung akaba rongsenji agiteta amshitsü tangatetba tajung agi tarutsü atema rezünga ayur amato amshinüseta mamshii yutsüba lir, anungji Naga yimten nüchiso bushirtemi Naga yimten nüchiso mangu tashi Nagaland ali telong nung akaba rongsentemji agiteta mamshii alitsü ta asüba tangatetbaji Naga nunger tarutsü lanurtem bilema inyakba mapa ka lir ta angatetdi. Ajisüaka, taoba mapang amato masü, Naga yimten nüchiso tongpang rara-raraa asenok yimten nüchiso angutsü teimla maliba maliba kuma odagi aser joko tanü Naga yimten nüchiso bushirtemia akhidang Naga yimten nüchiso bushiba mapang bushiba nüchiso to masü saka India den külemi lemsaa agitsüba nüchiso indang jembir, anungji nüchiso mangu tashi Nagaland nung ali telong nung Tsüngremi aremokja yutsüba rongsen agiteta mamshii alitsü ta asüba tangatetba aser ozüng to salatsü mapang tongogo. Iba denji alima nung nisungtem shisatsü aser tashitemetet aienba ya anüing petinu aser tzüim tarok tashi tuagi aser luagi anogo shia tuluba tuluba kuma aienba angur. Ibayongji, ashiko, tanü sentisa amshia aliba osettem ya kangabo menüngdakba osetang ka kumadoktsüa akok. Aji oda, akhidang yi putu nung yin sentisa amshia alidang plastic agi melen ama, ashiko tang gari nung atsükba totzütem ya electric aser anü (solar) tashi amshiba agi menüngdaki akümtsü akok. Iba amaji ka atalokra, Nagaland nung Naga nunger küm paikaya ali telong nung akaba totzü matsüteti rezüng ayubaji amajok akümtsü. Atangji, Nagaland nung akaba ali rongsentem ya government meyong masü saka nübortem kija aser kidong meyong, anungji government-ia ali kiburtem o totzü atsür company na ajurutepdakja jembitsüla. Ajisüaka, tang amai government-ang ali kibur kümer company den jembira, ali kiburtemi ajibo nunga asütsü aser aji tim asütsü. Anungji, Nagaland nung totzü atsüba mapa yabo government, company aser ali kibur ta telok asem külem külemi tangatettep ken o jembia renem nung ashi, kadang metenzüktettsü. Government nung alirtemi aji metettsüla.

OLEMSABANG

NAGALIMAJI KHRISTAN LIMA TA MAPA AGI KULI SAYUTSÜLA

~ L. Kika Pongener.

Naga lima ya Khristan noklang shilem nung 90 % aliba linük ka ta ashitsü akok. Naga lima ya alima matsüngdang yimjak nung "Naga limaji Khrista asoshi" (Nagaland For Christ) ta yimyim ayimoktsüba linük ka lir. Naga lima nungi alima kintem dangi Missionary merijang ter yoktsü Tsüngrem tsüngdang azüngashia nangzüka lir. Naga lima nung yi majemtsü, yi meyanglutsü aser yi mayoktsü (Dry state) Tsüngrem tsüngdang azüngashia atemzüka nangzüka lir. Naga lima nung 1970s nungi Revival milak jangrua aoba agi alima ajunga ayimsünga oa Revival milak jangrua tamangertem aika temulong meyipa Yisu Khrista agizüka ayimsünga aor. Arogotem nung Revival sentong akaba shia arogopurtemi ozü Naga lima ya Missionary lima ka kümdakjang ta Tsüngrem dang takangba ola yoka teka mahdena ken atener.

Atangji, Naga limaji Khristan lima ta ajatsüba kanga tapet aser tetemsu lir. Sorkar yimsüsuba bangdak menden reprangdangra, Nagaland State Assembly nung MLA Seat-60 prongla nung Tatar-60 prongla Khristan temeja mena lir. Sorkar Department balala nung ketdangser tazüngbur nungi tenzüker alua tilatiba tashi noklang shilem nung 90 % Khristan temeja mena lir. Dimapur jila nung tangar tamangba yimsü tenla-ki Mandir, Mosque, Temple kar aliba dak alaka.... Naga lima tanga jila aser yimtsüngtem nungpo kecha nunga, asenoki amangba Tsüngrem külemba khristan-tem tenlaki dak alaka....Tanga tamang yimsü Hindu, Muslim, Sikh, Budhist, etc. külemba tenla-ki ka danga mangutsü. Naga lima tekong-tenem ajunga nung Tsüngrem külemdak tenla-ki yanglua angutsü aser tenlaki ajak nungji 'Kangki' nokdaka aliba angutsü. Anungji Naga limaji Khristan lima ta item temaitsütem jagi metetdaksür aser kuli sayur.

Ajisuaka, item temaitsütem jagi Khristan lima ka amai sayuba jagi teperi masü, kechiyong itemjibo tema tereprangtsütem dang, saka shitakba telung mapa agi kuli sayutsüla. Naga limaji Khrista asoshi ta sangdongbaji alima ajungai meteta alinung, kadang Naga lima reprangi/sem dangi Foreign Tourists & VIPs arudir Naga limajibo kodak lima amai alitsü südi ta yimla-a arur. Ajisuaka, tesasatsüka, kadang bendangertemji Naga lima tonga arudir, parnoki yimlaba ama-to masü, khenyongi balaka tesempatsüka aser temekongtsüka angudang kanga aoksa-a alitsü südi....!!!??? Kechiyong parnoki par lima nungi otsü /osang angashiba den asangsang nung asen lima tiaji medemdangdang kanga sungmanga alitsü südi....!!!??? Kodang parnok asen lima nung Jila-tem yimti yimdong ajanga sua aor, yimti yimdong ajak nung Naga nunger karbo yi agi meseper jaja-a angutsü....!!!??? Ano karbo yi agi meseper kilentsü /nallah nung lungdaka mejanga angutsü...!!! ??? Ano karbo yi jemer raratepa/züktepa angudang kanga sungmanga alitsü....!!!???

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Khristan teloktemi 'Assisted Suicide' anema sarasadem ayonger



London nung Khristanemi 'Assisted Dying for Terminally Ill Adults Bill' anema longkak aitba noksa nung angur.

Metsüremi/March 10, 2025: UK tesem ajaklen Khristan telok balalai March 25, 2025 nü 'National Day of Prayer Against Assisted Suicide' ayongzükogo.

The Christian Institute leniba nung Affinity, CARE, Christian Medical Fellowship aser Evangelical Alliance-i 'assisted suicide' ozüing anema iba sarasadem ayongzüker.

March 25 nü Khristanemi Assisted Dying for Terminally Ill Adults Bill anema longkak aita sarasademtsü. Tang iba ozüing ya committee kati reprangshidar aser April ita nungi Stage 1 report nung ajemdaker o lemtep tenzüksü.

The Christian Institute nung Director, Ciarán Kelly-i, "Shirangertem yaria südaktsütsü atema ozüing benoktsü alibaji tamakok ngudakjang, ta sarasademtsü mapang tongogo," ta ashi.

Khristan teloktemi Khristanem aser Arogotem dang Tenla kidang mesüra pei kidang iba anogo nungji sentong ayongzüka sarasademtsü aser iba osang sangdongtsü ayongzükogo.

Khristanem dang item omen nung ajemdaker sarasademtsü ayongzük; shirangertem yaria südaktsüba dang nungibo temeim agi anepalutsü, iba bill ajanga takoksaji yimtenren lenirtem

aser journalist nem angatetdaksütsü, shiranger aser doctor tem tesendaktep tajungba akümtsü, iba bill anema ola adoker yimtenren lenirtem nem tenüngsang agütsütsü aser tasü itta iba bill anema nokdaksü, Parliament nung Khristan teloktem atema sarasademtsütsü, iba bill magizüktettsü atema sarasademtsü aser iba bill anema ola adoker mongintem olaji yimsüsürtemi akümtsübütsü atema sarasademtsütsü.

Yaküm December ita tetenzüklen UK nung tatartemi 'assisted dying bill' atema vote agütsütepba sülen UK nung Khristan lenirtem aser meimchir temeden atema inyakba teloktemi iba bill aitsü tenzüka liasü.

O entepba sülen House of Commons nung züingsem 330 nungi 275-i England aser Wales nung mapang talangka timtema shirangertem aser ita 6 den tajemba taküm alitsüpur shirangertem yaria südaktsütsü pusema vote agüja liasü.

Tatembangbuba voting ji taküm agitsü. Iba Bill ya ozüing akümtsü atema Parliament nung Chambers anaprongla nung agizüksü nüngdak.

Tang tashi nungbo UK nung shirangertem yarisema südaktsüba ya ozüing alema lir aser aibelenertem küm 14 tashi

tepuokdak ayutsü akok.

2015 küm nunga assisted dying bill ka benoka vote agütsütep saka tamakok angu, ajisüaka yaküm voting nungbo takok nguogo.

Tamalen Evangelical Alliance nung CEO, Gavin Calver-i, "Asen putu mapang loktiliba nung tang temelenshi tulutiba alitsü atema benoker. Tia maka, iba bill ajanga asen loktiliba nung soseta asütsü atema ozüing ajanga temelaba agütsütsü," ta metetdakja liasü. Joko teimla malir shirangertem yaria südaktsütsü ozüing agizüka aliba linüktemji Canada, New Zealand, Spain aser Australia lir. US nunga Oregon, Washington aser California densema state aika nung iba ozüing agizüka lir.

Iba bill benokertemibo, iba bill ya mapang talangka shi nung kanga timtema shirangertem temeim agi südaktsütsü atema lir ta ashir, ajisüaka UK nung denomination balala nungi Khristan lenirtemi, iba ozüing ya ajanga meimchir ka taküm senti süa mezüngshir aser iba ozüing ya ajanga kanga tantsür-tamburtem mesüra matamabensartem takoksa angutsü, kechiyong parnoki parnok ya tangar atema khuret ka ama bilema parnoki asütsü atema telemtetba agitsü, ta ashir.

Ramadan benjung mapang Khristan school tem shibangtsü tuyu

March 10, 2025: Nigeria nung Muslim nunger ketdangsertemi Ramadan benjung mapang piyong Khristan school tem shibangtsü tuyuogo.

Tetezü school ajak March 1 nungi March 31 anogo tashi shibangtsü.

Nigeria kübok Kano, Katsina, Bauchi aser Kebbi state tem nung governor temi 'Ramadan' benjung mapang nung Khristan school ajak shibangtsü tuyuba sülen Khristan lenirtem, tesayurtem unions aser kaketshir tentet balala nung lenirtemi iba tetuyubaji aitsüogo.

Khristan melungtet telok Open Doors-i ashiba agi, Katsina nung police tongti ketdangsertemi, sorkar school

tem dang masü saka nija school tem-a ajak shibangtsüla aser iba tetuyuba tashi mangartem anema inyaksü, ta metetdaksüogo.

Open Doors nungi mongin kati, "Shisaliok temeden ya yimsü kecha mebendangi kaketshir ajak nem agütsüba temeden ka lir. Ajisüaka iba tetuyuba ajanga shisaliok aser minorities yimsü temeden anema inyaker," ta metetdaksü.

Paisa, "Iba tetuyuba ya tatishitsü tamajung ka asütsü, aser iba tetuyuba ajanga tanga yimsü temeden anema-a inyaksüa akok," ta metetdaksü.

National Association of Nigerian Students otongdar, Samson Adeyemi-i,

ketdangsertemi tatishitsü tamajung ka tenteta yutsür aser yimsü tongti kümdaktsüba ajanga kaketshirtem shisaliok temeden anema inyaker, ta aitsü.

Catholic Bishops' Conference-ia, iba tetuyuba ya Nigeria nung secular temzüng alema lir, kechiyong Nigeria kübok state kecha nunga official yimsü malitsü lateta lir, ta metetdaksü.

Christian Association of Nigeria (CAN) nung Tir, Rev. Daniel Okoh-i, iba tetuyuba ajanga sensaker tanurtem shisaliok tsütsü kanga takoksa angutsü, ta ashi.

Paisa, Saudi Arabia nungbo Ramadan benjung mapang nung school tem lapoker, ta ashi.

ANOGO ABEN TSÜNGREM DEN

Tabensa osang tajung

"Aser kodang ni nenok dangi arudir Khrista temoatsü tabensaba agi arutsü ta ni metet"

(Rom. 15:29)

Mezüng Christmas anogo nung sannükertem dangi bener adok. Osang tajungji tepelatsü osang tulu nüburtem dangi bener aruba (Lk. 2;10). Osangtajung tetezü tajungtibaji Pauli 1 Korint 15;3,4 "kechiaser ajak dang tongtibanba ama ni kechi agizük, ibaji.. .Lai-i shia aliba amaji asen menen asoshi Khrista asü, aser Pa arem aser Lai nung aliba amaji tasemnü buba nung Pa shia arudaktsü." Temerük aser tabensa osangtajungji ibai lir. Entokba mesüra bendenloktsübaji teraksa lir.

Yisu Khristaji Tsüngrem osangtajung lir. (Yn. 14:6.) Teperiba osangtajung tetezü Khrista ajanga temoatsü ajak asenoki agizük, item otem amshia asenok meshiteta lir. Kodang yimjung osang jembir, Khristai tenla agütsüba indang asenoki jembir (Ef. 2:14-16; 6:15). Taochi osangtajung jagi Khrista kümtetdakba indang jembir (T.mapa 20:24; Ef. 2:8)

Tsüngrem yimli osang tajung jagi Khrista chuba akümba indang jembir (Lk. 8:1; Isa 52:7). Yisu Khrista nungi pilar temoatsü mali (Ef. 1:3). Khrista asenok asoshi kechi mapa renemtsü iba nung Tanela Temeshi kecha bendenloktsü makok. Ochi Tanela ama Tanela Temeshi-i asenok ochiba Khrista dangi anasaba anasaba anitsü. "Pai mulungba nung kecha mejembitsü. Pai Khristai mulungba kechi aji agitsü aser asenok dang ashitsü (Yn. 16:13-15). Iba nung tamakok angur osang tajung tanga sang nung aputsü." Khristan kümdanga jajang.

Nicaragua nung yimsü temeden ano tamajungba dang akümer

March 10, 2025: Nicaragua nung human rights & religious freedom report ka ajanga, central America nung aliba iba state nung tamangba yimsü temeden jenjang tamajungba dang akümer, ta metetdaksüogo.

Khristan melungtet telok Christian Solidarity Worldwide (CSW)-i renemba report nungji yamai shia lir, 2024 küm nunga iba linük nung yimsü temeden anema inyakba tatalokba 222 liasü, aser item tatalokba ajanga nisung meyirjang aika kongshi.

Tang iba linük nung police-i yimsü dak sendakba maparen balala mita reprangba aser azüokba ya tebilemtsü onük tuluka lir.

National Police-i Catholic aser Protestant Khristanemi akhidang nungi benshia aruba, yimdong süa jajaba nokdangogo. Spanish oshi nung Laishiba meyipzükbä nüngtem nung Khristanemi yimdong süa jajar.

Iba linük nung ketdangsertemisa Khristanem sentong aika thinentesüogo.

Iba linük nung Khristan

lenirtem aika tepuokdak lir. Protestant Pastor, Efrén Antonio Vélchez López-a küm 23 tepuokdak ayutsü obendang agütsüba sülen tepuokdak lir. Pa diabetes den külemi temang nung timtem aika adokogo ajisüaka pa nem medical teyari magütsür.

Catholic lenir ana- Carmen María Sáenz Martínez aser Lesbia del Socorro Gutiérrez Poveda nata yaküm August ita nung apuba sülen jail nung ita trok jungogo.

CSW nung Advocacy Director, Anna Lee Stangl-i, "Nicaragua nung Tir Daniel Ortega aser pa kinüngtsü Rosario Murillo na den Sandinista National Liberation Front-i lokti tentettem nem temeden magütsür aser sorkar anema ola adoker ajakji linük anemertem ta züngshir," ta metetdaksü.

"Nicaragua nung yimsü temeden atema maneni inyaker ajak dang onoki pelar. Iba linük nung ochi temeden, yimsü temeden aser democracy pusemertem onoki maneni nungittsü," ta Stangl-isa metetdaksü.

Rara anentsü akhangba ama inyaktsü Ukraine renema lir: US

Washington, Metsüremi/ March 10 (Agencies): Russia den ceasefire alitsü US-i akhangba ama inyaktsü Ukraine lenirtem renema lir südi ta Trump administration-i amanger, ta US state department ketdangsür kati ashi.

Ukraine lenirtem den Mongulbarnü jembishinütsü atema US Secretary of State Marco Rubio aser National Security Adviser Mike Waltz na Saudi Arabia tonga aotsü lir.

US Tir Donald Trump-i Ukraine Tir Volodymyr Zelenskyy dang pai akhangba ama Moscow den kera ceasefire alitsü tali ajungshir, saka US-i security guarantee kecha nangzüka mali.

Anogo ter tejakdang tena ya White House nung nisung ajaki ngua lia asatep aser Zelenskyy ya rara tembangtsü renema mali ta Trump-i shia liasü.

Russia Tir Vladimir Putin-i tashi ajak amshia February 2022 nungi Ukraine amak tenzük, aser tang Moscow kübok Ukraine litsü shilem 20 shi lir.

"Parnok senior level yagi aruba tetetzü parnoki mener jembishinütsü renema lir ta sayur," ta state department ketdangsür yagi pa tenüng miimshia Jeddah nung Ukraine den jembishinütsü indang ashi.

Zelenskyy ya Crown Prince Mohammed bin Salman ajurutsü Saudi Arabia-i aotsü lir, saka Salman-ibo America nunger den jembishinüba nung shilem balaka agitsü meimlar.

Ukraine tenüng nung Zelenskyy indang head of office Andriy Yermak, linük national security adviser, foreign minister aser defence minister adentsü.

Zelenskyy-i Hombarnü social media nung, rara tenzükba second nungi Ukraine ya yimjung bushia liasü aser tang tashi maneni raraba ya Russia mechi lir ta onoki teti shia arur, ta zülutsü.

Mapang tatsüka lir osangbener senden ka nung jembidang, Ukraine yagi shidakba nung yimjung aginer asü masüar jangjatsü tongtipang lir, tya Kremlin odongtar Dmitry Peskov-i ashi. Zelenskyy-i yimjung maginer, ta US ketdangsür temi ishiben tai tonglokja lir.

Ukraine lenir dang yimjung ken o kecha mejembidang atsüanem akatsü US-i kanga ajungshia arur, aser kasa mapang paia Kyiv asoshi security guarantees tajung

aginer aser taoba mapanga Putin-i ceasefire tezüngzüktep nung aibelen asü ta ashir.

Yimjung tezüngzüktep yanglutsü meranga Hokulbarnü Trump-i Moscow nem ano tenokdangba agütsütsü amokmerena liasü. Iba rara ya mechi US-i Russia nem tenokdangba tesashi agüja lir.

Ni iba mera agitsü kanga shisadanger, kechiaser tangya Russia-i tongpang nung Ukraine kanga anokshitsür, ta Trump-i shia liasü.

White House nung mangatettep adoker mapang tatsüka tsüngta Zelenskyy-i iba tatalokba indang sasa bilemba lemsatep aser US den tesendaktep yanglushitsü merang, koba par linük asoshi mitkar tsütsü teyari tulutiba agütsür linük lir.

Mapang tatsüka lir Trump indang special envoy Steve Witkoff-i sangdong ka nung Zelenskyy-i tatok meshia aser pelaba lemsatepa züluba shiti ka Trump dangi aruogo, ta shia liasü.

US team-i Saudi Arabia nung Russia-Ukraine rara tembangdaksütsü meranga yimjung atema "framework" ka jembiner, ta Witkoff-i ashi.

Saudi Arabia nungya ali rongsen tezüngzüktep indanga jembitsü ta ashir, koba White House nung mangatettep adokba ajanga anendaka lir.

US-i security guarantees agütsüra 'rare earth mineral' aliba agitettsü temelaba agütsütsü, ta Ukraine-i ashi.

White House nung mangatettep adokba ajanga US-i Ukraine nem mitkar teyari agütsüba aser itdangiter lemsatepba ajunga anena liasü.

Washington nung US-Ukraine mangatettep madokdang February 18 nü Rubio-i Russian Foreign Minister Sergei Lavrov den Saudi Arabia nung ajurutepa jembishinüa liasü. Ibai Trump-i Putin den phone ajanga jembiogo ta sangdongba sülen liasü.

Tongpang tsütsü Ukraine mitkari yasüng nungi tanep tashinung Russian drones 130 khazüka yokogo ta ashir.

Hopta tatemlen Russia-i drone amshia amakdang nisung 25 tepset aser parnok ya timba Donetsk anüdoklen Dobropillya nung liasü.

Ano Deobarnü nisung aliba tesem asem tanaben agiba sülen Russian sepaitemi Kursk region nung Ukraine sepai meyirijang aika sapanngtsü meranger ta osang angazüker.

Argentina tzümetsüng lendong nung nisung 16 asü



Buenos Aires, Metsüremi/ March 10 (Agencies): Argentina kübok tzüküm nung aliba Bahia Blanca yimti tzümetsüng agi kongshia nisung 16 asüba sülen tir Javier Milei-i anogo ka ana mang ayimtsüba sangdongogo. Iba lendong nung ano nisung ishika samara bushidar.

Tir office ajanga Honibar aonung, linük ajunga nung anogo asem mang ayimtsü ta metetdaksüogo. Bahia Blanca yimti nung tzünglu kanga sashia aruba sülen tzümetsüng agi konshia liasü. Ajisüaka iba sangdong ajanga mang ya koba anogo nungi ayim tsüksü iba

indang osang tejangja magütsü.

"Lendong agi kongshir alirtem nem sorkari lenla ajak nung takokba tashi teyari agütsütsü bendang agütsür lir," ta tir-i metetdaksü.

Bahia Blanca temeket nung ghonda ishika tsüngda tzünglu 260 millimeters (10 inches) aruba sülen Hokolbarnü tzümütsüng agi kongshia liasü.

Minister of Security of the Province of Buenos Aires Javier Alonso-isa, Deobarnü arishi küm ka aser pongu tain tetsür chanu ana tzü agi aponger oa liasü, ta ashi.

Bahia Blanca Mayor Federico Susbielles-i

osangbenertem den sensaksemba mapang ashiba agi, tzümetsüng agi USD million 400 alang teraksatsüba bener arutsüogo.

X nung post ka ajanga pai, nisung 16 asüba jangjaogo, saka asürtem timba akümtsü imlar, kechiyong samara alirtem maneni bushidar, ta ashi.

Tzünglu kanga sashia aruba den yipru den aitba sülen tzüküm nung aliba tesemtem nung power maka kümogo.

Economy Minister Luis Caputo-i X ajanga ashiba agi, sorkari Bahia Blanca nem senotsü teyari agütsütsü atema pesos billion 10 lezmütsüogo.

North Korea-i missile aika tendangogo



Seoul, Metsüremi/March 10 (Agencies): South Korea aser United States na military drills ayongzüka agiba mapang North Korea-i ballistic missile aika tendangogo.

South Korea indang Joint Chiefs of Staff-i Hombarnü ashiba agi, North Korea-i taküm tang agi pongubenbuba missile tendangba mapang linük anüolen tzükümleni missile aika khaketa yokogo.

South Korea aser US na kümshia agiba Freedom Shield joint exercises tenzüker agia aliba mapang item missile tem tendangogo. Iba drill ya March 20 nü tashi agitsü renema lir.

Linük anati iba sentong ayongzüka agiba ya Pyongyang-i aitsüogo aser iba inyakyim ya parnok rongshiba inyakyim ka aser iba ajanga mangatettep adokdaksütsü ana nung lir, ta ashi.

Freedom Shield drills ya US tir Donald Trump-i tir mapa agizükba sülen linük ana tsüngda tang mezüngbuba joint exercise tulu ka agiba lir.

Trump-i mezüngbuba term tir abenba mapang North Korea lenir Kim Jong Un den asemben ajurutepogo aser paisha, US-North Korea sensaksem tenzüksütsü mulunga aliba lemsatepogo.

Pyongyang-i iba dak sendakba nung kecha telangzüba agüja mali, saka Washington aser Seoul nati joint military exercises ayongzüka agiba ya aitsüogo, koba Kim-i parnok amaktsü atema renemshiba ka ama agir.

North Korean Ministry of Foreign Affairs-i, US aser Asia nung parnok den sendaktepa aliba linüktemi amokmerenba nungi jenboa alitsü atema Kim-i linük nuclear force terenlok

asoshi jenjang agitsü nükjidong aliba metetdakja liasü.

South Korea aser US nunger sepaitem live-fire training anena ataba mapang Freedom Shield exercises tenzükogo. Seoul-i parnok indang fighter jets anati warmup drill mapang aibelena civilian tem aliba tesem ka amakba bushisüngdangdar.

Iba lendong nung nisung 30 shi yiru aser nisung anabo kanga mejungi yirua liasü. South Korea indang fighter jet temi taoba Brehostibarnü North Korea arrtsü anasa Pocheon jila nung aibelena civilian aliba tesem nung MK-82 bomb ti khalokja liasü.

Iba tatalokba atema South Korean Air Force chief of staff General Lee Youngsu-i nisung yirutsüba aser kiojen raksatsüba atema tatok meshiogo aser iba ya mataloktsü asü ta shia liasü.

Hockey India-i annual awards atema senpet sangdongogo



Metsüremi/March 10, 2025

(Agencies): Hockey India-i 7buba Annual Awards atema otsütsüsa senpet sen crore 12 agütsütsü telemtetba agiba sangdongogo. Iba atema asayar 32 category ti nung shimogo.

Iba award sentong ya Honibarnü agitsü, kong 2024 season nung kanga junga asayaba asayartem tushitsü.

Narokümtem rongnung Player of the Year atema Balbir Singh Sr Award densema lir, koba ajanga tebur aser tetsür asayar tajungtiba tushitsü.

Lanur asayartem Jugraj Singh Award for Upcoming Player of the Year (Men) aser Asunta Lakra Award for Upcoming Player of the Year

(Women) ajanga tushitsü.

Iba den bendenloksema Baljit Singh Award for Goalkeeper of the Year, Pargat Singh Award for Defender of the Year, Ajit Pal Singh Award for Midfielder of the Year, aser Dhanraj Pillay Award for Forward of the Year amala jurila tetushi balala agütsütsü.

Sentong nung Olympic nung bronze medal anguba team den taoba küm Asian Champions Trophy akokba tebur aser tetsür team tushitsü.

Hockey India Annual Awards 2024 atema Nominees:

Hockey India Baljit Singh Award for Goalkeeper of the Year 2024: Bichu Devi Kharibam, Krishan Bahadur

Pathak, PR Sreejesh, Savita.

Hockey India Pargat Singh Award for Defender of the Year 2024: Sanjay, Amit Rohidas, Harmanpreet Singh, Udit.

Hockey India Ajit Pal Singh Award for Midfielder of the Year 2024: Jarmanpreet Singh, Hardik Singh, Nilakanta Sharma, Sumit.

Hockey India Dhanraj Pillay Award for Forward of the Year 2024: Lalremsiami, Abhishek, Sukhjeet Singh, Navneet Kaur.

Hockey India Asunta Lakra Award for Upcoming Player of the Year (Women - Under 21): Beauty Dungdung, Deepika, Vaishnavi Vithal Phalke, Sunelita Toppo.

Hockey India Jugraj Singh Award for Upcoming Player of the Year (Men - Under 21): Arshdeep Singh, Amir Ali, Shardanand Tiwari, Araiyeet Singh Hundal.

Hockey India Balbir Singh Sr Award for Player of The Year (Women): Savita Punia, Salima Tete, Sangita Kumari, Navneet Kaur.

Hockey India Balbir Singh Sr Award for Player of The Year (Men): Abhishek, Hardik Singh, Harmanpreet Singh, Sukhjeet Singh.

BNP Paribas Open: Swiatek & Medvedev na round 4bubai iogo



Metsüremi/March 10, 2025

(Agencies): Tang asaya aliba BNP Paribas Open nung defending champion Iga Swiatek-i 6-0, 6-2 agi Dayana Yastremska ayong ayonga koka round pezübuba tongtetogo.

Iba asaya ya Swiatek-i minute 65 nung dang koka liasü. Poland tsür la yagi Ukraine tsür Yastremska ya amokbanger asaya aser lai mezüngbuba game 10 koka liasü.

Laisa, serve break asütsü maongka 11 ben anguba 6 agiteta liasü aser la indang serve break asütsüsa khen danga majangshi-i asaya liasü. Yastremska-i la indang service game tatembangbuba ana koka liasü.

Swiatek taruba asaya Czech tsür Karolina Muchova den asayatsü, shibai külem Czech

tsür Katerina Siniakova 7-5, 6-1 agi kokogo.

Arishi küm 17 tain Mirra Andreeva aser 2023 Indian Wells champion Elena Rybakina nata Swiatek den round pezübubai iogo.

Andreeva, shibai taoba Ita Dubai Open koka WTA 1000 asayamung ka akokba tanutsütüla aküm lai tasembuba round nung Denmark tsür Clara Tauson 6-3, 6-0 agi ayong ayonga koka liasü. Rybakina-ia Britain tsür Katie Boulter 6-0, 7-5 agi kokogo.

Tetsürtem rongnung United States tsür fourth seed Jessica Pegula, shibai taoba hopta Austin nung WTA title ka benogo, lai China tsür Wang Xinyu 6-2, 6-1 agi minute 62 nung dang koka liasü.

Pegula taruba round nung

Ukraine tsür Elina Svitolina den asayatsü, shibai Danielle Collins 6-2, 6-4 agi kokogo.

Kasa asayamung tebur kija asaya nung Russia nung asayar Medvedev arishi küm 20 tain Michelson den asaya, saka Michelson ya game ana dang asayaba sülen shirangba ajanga masayatetsüsa akümba ajanga pai asaya koka liasü.

Tebur kija asaya nungsa Paul-i Britain nung 2021 Indian Wells winner Cameron Norrie 6-3, 7-5 agi koka liasü.

Eighth-seeded Stefanos Tsitsipas-ia 6-3, 6-3 agi Matteo Berrettini kokogo. Netherlands nung Tallon Griekspoor shibai tanabuba round nung top seed Alexander Zverev tsükdakja liasü, pai 7-6 (7/3), 6-3 agi France nung asayar Giovanni Mpetshi Perricard kokogo.

Commonwealth Games Federation nüngja melenogo

Metsüremi/March 10, 2025

(Agencies): Commonwealth Games Federation (CGF)-i Hombarü parnok nüngja Commonwealth Sport agi melenogo aser ashiba agi, iba ya governing body ka nungi "movement" kati melenba lir.

Nüngja melentsü atema telemtetba agiba ya March 10 nü Commonwealth Day amungba mapang sangdonga liasü.

"2025 küm Commonwealth Day nungi Commonwealth Games Federation dang Commonwealth Sport ta ajatsü," ta Commonwealth Games and Commonwealth Youth Games governing body-i metetdaksü.

"Commonwealth Games Federation (CGF)-i parnok indang public brand nüngja Commonwealth Sport agi melener. Nüngja melenba ajanga iba lokti tentet ya 'Sports Federation' ka nungi 'Sports

Movement' kati melenba sayur," ta parnokisa metetdaksü.

'Commonwealth Games Federation' ya legal entity indang nüngja ama dang amshitsü.

Kasa mapang nung Commonwealth Sport Patron King Charles-i, Glasgow 2026 Commonwealth Games atema Buckingham Palace nungi Commonwealth Sport King indang Baton Relay officially tenzüksütsü.

King Charles-i, mezüngbuba batonbearer, Sir Chris Hoy nem baton agüja relay tenzüksütsü. Glasgow 2026 lapokba sentong agitsü atema anogo 500 anunga lir.

Iba Baton Relay ya Commonwealth Games atema relay talangtiba asütsü aser linük 74 nung Commonwealth Games Associations ajak nem sentong balala ayongzüka agitsü atema anogo trokrok agütsütsü.

England batter Brook 2025 IPL nung masayatsü

Metsüremi/March 10, 2025

(Agencies): England nung batter Harry Brook-i, England tenüng nungi asayatsü atema rangloker inyaksü asoshi taküm Indian Premier League nung masayatsü telemtetba agiogo.

Arishi küm 26 tain asayar ya taoba küm IPL auction nung sen crore 6.25 agi Delhi Capitals puri alizüka liasü.

Ajisüaka pai küm anabuba atonga iba asayamung nung shilem magitsü atema telemtetba agiogo, aser iba ajanga pa asayamung nung küm ana masayadaksütsü atema tenokdangba agütsütsü ana nung lir.

"Ajakibo mangatetsü aser parnok angatetsü ni mimlar, saka ni kechi shitaka ta bilemer aji inyaksü nüngdaker aser aji linük tenüng nungi asayatsü atema rangloker alitsüba ya lir," ta Brooks-i ashi.

"Ni kanga mazüangi asayaba sülen ni recharge asütsü mapang nüngdaker."

Brooks ya England team nung format ajak nung asayar aser taoba kuma pa tetsü asüba sülen IPL nung masayatsü telemtetba agia liasü.

IPL-i taküm asayamung atema ozüng tasen ka benokogo aser iba kübok shimmer aliba asayar kati masayatsü atema telemtetba agira season ana atema tenokdangba agütsütsü, ta

lateter lir. Yirur alirtem mesüra medical tsütsü timtem alirtem iba ozüng yagi malentsü.

Brook ya Champions Trophy nunga England team nungi asayaogo. Parnoki iba asayamung nung asaya ka danga makok.

Iba masüdag pa India-ia arua white-ball asaya ti nungi ka akokba England team nung densema liasü.

Brook-i taküm junga masayateti arudar aser pai innings 11 nung run 188 dang yanglur lir aser pa indang average 17.09 lir. Ajisüaka pa ya white-ball asaya nung Jos Buttler melena captain asoshi shimtsüpur rongnung ka ta züngshir.

Brook-i, iba telemtetba agiba atema Delhi Capitals aser franchise pusemertem dang tatok meshiogo.

England team May 22 nü nungi tenzüka Trent Bridge nung Zimbabwe den four-day Test ka asayatsü. IPL final ya May 25 nü asayatsü.

Zimbabwe nung asayaba sülen parnok West Indies den one-day internationals asem aser T20 asem asayatsü aser maneni India den Test pongu asayatsü.

Taküm ano parnok Australia nung oa Ashes asayatsü aser iba sülen South Africa, Ireland aser New Zealand den white-ball asayamungtem asayatsü.

BILEMDANGANG

"Nai lenmang mongutetra tanga lenmang ka mesapokang."